

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
JAN 10 1941

9

7

3237/4632.83

梧州府志卷之十五

四十五

哈佛大學漢和圖書館珍藏印

名宦志總序

王者任官然後爵之位定然後祿之求志者行其
義食祿者忠其事外盡厥職內盡厥心豈爲名哉
雖然名何可不顧也紀之司勳播之歌咏傳之學
士大夫之口載之金石竹冊之文此豈得以虛名
借者耶梧州僻處邊方而地設重鎮宦是土者治
莫先乎聲教嶺南華風不徒任錫始矣自歷代休
養生息政化日新循良之吏史不絕書若价人經
略於維翰元老秉旌於推轂蠻氛賴其鎮定寇虐

式其掃除允足勲埒雲山操同冰井至於懷清履
潔眷念闕廷雖經流離播越之後而名不泯滅千
載下猶慨然慕之况郇膏召樹乎古云當於人鑑
其前事之師也志名宦

梧州府志卷之十四

名宦志

宦蹟上

紀宦蹟於郡志自應以二千石循良爲先而後三
異四長及廉丞傑簿之屬皆得次第舉焉茲以其
爲治有功德被梧人者備列於傳序以時代不分
官職一準名宦列祠之例以見士君子苟能盡厥
職而於物有濟雖秩有崇卑均足以樹立不朽云
漢

路博德西河平州人元鼎五年下詔討南越博德

以衛尉授伏波將軍出桂陽下湟水主爵都尉楊僕為樓船將軍出豫章下橫浦漢書作湟水歸義越侯鄭巖為戈船將軍出零陵下灘水田甲為下瀨將軍下蒼梧使馳義侯何遺別將巴蜀罪人發夜郎兵下牂牁江會番禺建德呂嘉皆城守博德軍西北會樓船攻敗越人越素聞伏波名乃為營遣使招降者賜印綬復縱令相招遲且城中皆降呂嘉建德夜與其屬亡入海伏波因問所得降者知其處追獲之其蒼梧王趙光桂林監居翁等皆降遂以其地為儋耳珠厓南海蒼梧鬱林合浦交趾九

真日南九郡今蒼梧鬱林博德所開也祀蒼梧名宦

羅宏荊州長沙人元封五年初置交趾部刺史察所部治蒼梧郡往多以荒遠行罕遍部吏因得恣其貪殘宏為刺史春行冬息遍歷所部咨詢疾苦太守多解綬請罪宏廉實舉發一時貪殘斂迹祀蒼梧縣名宦

按漢交趾刺史治在蒼梧自羅宏下諸公或交州日南或鬱林南海然威令皆自蒼梧故錄

錫光漢中人平帝時為交趾太守教導民夷漸以禮義化王莽末閉境拒守建武初遣使貢獻封鹽

水侯嶺南華風實光始之云

杜穆西漢末時守蒼梧值王莽亂閉境自守建武

一聞岑彭移檄陳漢威德穆遣使奉貢封列侯禮名宦

馬援字文淵扶風茂陵人其先趙奢爲趙將號馬

服君子孫因以爲氏建武十七年交阯女子徵側

徵貳反攻沒其郡九真日南合浦蠻夷皆應之寇

畧嶺外六十餘城側自立爲王乃拜援爲伏波將

軍以扶樂侯劉隆爲副督樓船將軍段志等緣海

而進隨山刊道千餘里十八年春軍至浪泊上與

賊戰破之斬首數千級降者萬餘人援追徵側等

至禁溪數敗之賊遂散走明年正月斬徵側徵貳

傳首洛陽封援新息侯復將樓船二千艘戰士二

萬餘人擊九真賊徵側餘黨都羊等自無功至居

風斬獲五千餘人嶠南悉平援所過輒爲郡縣治

城郭穿渠灌溉以利其民條奏越律與漢律駁者

十餘事與越人申明舊制以約束之自後駱越奉

行故事二十年秋振旅還京師援善別名馬於交

趾得駱越銅鼓乃鑄爲馬式上之初援在交阯常

餌薏苡實愛其實大欲傳其種軍載還一車援卒

有譖之者誣爲明珠文犀帝怒妻子遑懼不敢以

喪還舊塋肅宗建初二年追諡忠成侯祀蒼梧名宦

喻猛字驕孫豫章人和帝時為蒼梧太守以清白

為治郡人歌之祀名宦

綦母俊會稽上虞人安帝時為交阯刺史元初三

年合浦蠻反遣御史任遵督兵討之後以蒼梧當

合浦下蠻或流劫猝難回顧乃先保障蒼梧所向

摧靡功當封賞上書歸功於遵詔下美之

陳臨香山人舉孝廉永建中官蒼梧守導人以孝

弟民有遺腹子報父怨殺人吏獲之臨知其無嗣

令其妻侍獄中得產男郡人歌曰蒼梧府君惠廣

人能令死囚有後代後徵為廷尉郡民以五月五

日祠臨東城門上子孫最蕃蓋陰德所致云祀名宦

按一統志載郡人歌曰蒼梧府君惠及死能令

死人不絕嗣與此稍異

陳稚升東漢時為蒼梧太守治尚清靜民咸化之

囹圄常空祀名宦

張磐字子石丹陽人為交州刺史延熹五年長沙

零陵賊起攻入桂陽南走蒼梧時荆州刺史度尚

廣募蠻夷明設購賞破其渠帥降者數萬人其餘

黨入梧者磐自將擊之斬捕幾盡尚徵還京餘黨

復熾尙恐磐上狀先誣奏磐乃徵磐下廷尉會赦
磐不肯出獄吏曰天恩曠然而君不出何也磐因
自列曰前長沙賊胡蘭作亂荆州餘黨散入交阯
磐身膺甲冑涉危履險討擊凶患馘斬渠帥餘賊
烏竄荆州刺史度尙畏罪誣奏磐備位方伯爲國
爪牙而爲尙所枉受罪牢獄夫事有虛實法有是
非磐實不辜赦無所除忍以苟免磐不能也乞傳
尙詣廷尉面對曲直足明真僞尙不徵磐寧埋
骨牢檻終不虛出廷尉以其狀上乃徵尙詣廷尉
辭窮抵罪以先有功得原磐在官以清白稱

祀名宦

朱雋字公偉會稽上虞人也少孤以孝養致召太
守徐珪舉爲孝廉除蘭陵令政有異能爲東海相
所表會交阯部羣賊並起牧守不能制又渠賊梁
龍等與南海太守孔芝反攻破郡縣光和元年拜
雋交阯刺史令過本郡簡募家兵及所調分兩道
入旣到州界按甲不前先遣使觀賊虛實宣揚威
德以震動其心旣而與七郡兵俱進逼之遂斬梁
龍降者數萬人旬月盡定以功封都亭侯

周乘字子居安城人建安中以侍御史爲交阯刺
史上書云交州絕域習於貪濁強宗聚奸長吏肆

虐侵漁萬民今爲聖朝掃清一方時屬城解綬者三十餘人

蜀漢

李恢字德昂俞元人昭烈入益州恢爲庾降都督持節交州刺史昭烈崩高定恣睢於越巂雍闓跋扈於建寧朱褒反叛於牂牁惟恢鎮南土與諸葛亮聲勢相倚以功封漢興亭侯加安漢將軍建興

七年詔以交州屬吳乃徵恢還

舊志不載今依通志補入

魏

楊稷犍爲人景元四年吳將呂興以交阯叛歸魏

魏以南中監軍霍弋遙嶺交州刺史弋表遣稷率牙將董元毛炅等往戍交阯吳交州刺史劉俊大都督修則將軍顧容前後三攻交阯稷皆拒破之鬱林九真皆降稷遣毛炅董元攻合浦戰於古城大破吳兵殺修則劉俊晉太始五年吳復遣將軍薛翊監軍虞汜蒼梧太守陶璜等率兵十萬攻交阯時霍弋已死外援不至城中食盡死亡者半將軍王約反降吳吳兵入城獲稷囚送入都稷至合浦嘔血死晉追贈交州刺史

毛炅建寧人從楊稷戍交阯古城之戰炅殺吳大

都督修則稷表吳鬱林太守及交趾城陷吳爲吳所獲陶璜愛吳勇健欲活之吳謀欲殺璜璜乃戮之修則之子允生剖其腹割其肝吳厲罵而死吳

步騭字子山臨淮淮陰人建安十五年出領鄱陽太守歲中徙交州刺史立義中郎將領武射吏千人便道南行明年追拜使持節征南中郎將劉表所置蒼梧太守吳巨陰懷異心外附內違騭降意誘懷請與相見因斬狗之威聲大震士燮兄弟相率供命南土之伏自此始也益州大姓雍闓等殺

蜀所署太守正昂與燮相聞願求內附因承制遣使宣恩撫納由是加平戎將軍封廣信侯赤烏九年陸遜爲丞相猶誨育門生手不釋書被服居處有如儒生性寬宏得衆喜怒不形於色而內肅

然十一年卒

節吳志本傳

陶璜字世英丹陽秣陵人父基爲吳交州刺史孫皓時交趾太守孫譖貪黷暴虐爲百姓患會察戰鄧荀至擅調孔雀三千頭遣送秣陵民苦遠役思亂愈亟郡吏呂興因殺譖及荀以郡叛附晉卽拜興交趾太守尋爲其功曹李統所殺武帝乃遣麋

谷馬融相繼爲交阯太守皆病卒因命霍弋遙領之而遣楊稷董元等自蜀出交阯破吳軍吳遣虞汜爲監軍薛翊爲威南將軍大都督璜爲蒼梧太守與稷戰於分水璜敗退保合浦亡其二將翊怒曰若自表討賊而喪二帥其責安在璜曰下官不得行意諸軍不相順故致敗耳璜夜以數百兵襲董元獲其寶物船載以歸遂從海道徑至交阯元拒之諸將將戰璜疑斷牆內有伏兵列長戟於其後兵纔接元僞退璜追之伏兵果出長戟逆之大破元等以前所獲寶物厚遺扶巖賊帥梁奇奇將

萬餘人助璜元有勇將解系同在城內璜誘其弟象使爲書與系又使象乘璜輶車鼓吹導從而行元等曰象尙若此系必有去志乃就殺之遂陷交阯吳因用璜爲交州刺史璜有謀策周窮好施能得人心復助滕修討南賊破之惟九真郡功曹李祚猶保郡附晉璜遣將攻之不克祚舅黎晃隨軍勸祚令降祚答曰舅自吳將祚自晉臣惟力是視耳踰時乃拔皓以璜爲使持節都督交州諸軍事前將軍交州牧武平九德新昌土地阻險蠻獠勁悍歷代不賓璜征討開置三郡及九真屬國三十

餘縣徵璜為武昌都督以合浦太守修允代之交
 土人請留璜以千數於是遣還皓既降晉手書遣
 璜息融敕璜歸順璜流涕數日遣使送印綬詣洛
 陽帝詔復其本職封宛陵侯改為冠軍將軍在南
 三十年威恩著於殊俗乃卒舉州號哭如喪慈親
 朝廷乃以員外郎散騎常侍吾彥代璜彥卒又以
 員外郎散騎常侍顧秘代彥秘卒州人逼秘子參
 領州事參尋卒參弟壽求領州州人不聽固求之
 遂領州壽乃殺長史胡肇等又將殺帳下督梁碩
 碩走得免起兵討壽擒之傳壽母令鳩殺之碩乃

迎璜子蒼梧太守威領刺史在職甚得百姓心三
 年卒威弟淑子綏後並為交州自基至綏四世為

交州者五人

晉書

晉

陶侃字士行本鄱陽人吳平徙家廬江之尋陽王
 敦深忌侃功左轉廣州刺史平越中郎將太興初
 進號平南將軍尋加都督交州軍事時交州刺史
 王諒為賊梁碩所陷侃遣將高寶擊平之以侃領
 交州刺史錄前後功封次子為都亭侯進號征南

大將軍開府儀同三司

節晉書本傳

杜瑗字道言交阯朱戴人杜州府爲日南九德交阯太守初九真太守李遜父子勇壯有權力威制交土聞刺史滕遜之當至分遣二子斷遏水陸津要瑗收衆斬遜州境獲寧遜之在州十餘年將北還林邑王范胡達攻破日南九德九真三郡遂圍州城時遜之已去瑗與第三子元之悉力固守多設權策累戰大破之乃以瑗爲龍驤將軍交州刺史元與末進冠軍將軍盧循竊據廣州遣使通好瑗斬之義熙六年卒

杜慧度瑗第三子義熙七年除交州刺史詔書未到盧循襲合浦寇交州慧度率衆拒循於石碕破之時李遜子孫李奕李脫等奔竄石碕盤詰俚獠各有部曲循知奕等與杜氏有怨遣使招之奕等受循節度六月庚子循晨造南津令三軍八城乃食慧度悉出宗族私財以充勸賞弟交阯太守慧期九真太守章民並督率水步軍慧度自登高艦合戰放火箭雉尾炬步軍夾兩岸射之循衆艦俱燃一時散潰循中箭赴水死斬循及父嘏并循二子傳首建業封龍編縣侯武帝受禪進號輔國將軍其年南討林邑窮蹙乞降輸生口大象南金吉

貝乃釋之遣長史江攸獻捷慧度儉樸質素布衣
蔬食在州禁斷淫祀崇修學校歲饑則以私祿賑
給為政纖密有如居家由是威惠霑洽奸盜不起
少帝景平元年卒

杜宏文慧度長子初為員外散騎侍郎父卒就拜
振威將軍繼父為交州刺史亦以寬和得眾元嘉
四年文帝以廷尉王徽之為刺史宏文被徵時得
重疾乃扶病即路至廣州卒遣弟宏猷詣京朝廷
甚哀之舊志不載今依通志補人

檀和之高平金鄉人元嘉二十年冬為交州刺史

留意足民乃更練武會林邑王陽邁寇盜不已乃
以和之為龍驤將軍及振武將軍宗慤伐之和之
遣司馬蕭景憲為前鋒克其區粟城乘勝入象浦
和之與慤共克林邑陽邁奔竄獲其珍異和之既
克遠夷益自謙慎以餘財頒及交廣軍士捷聞召
還封雲社縣子以景憲代之依通志補人

陳隱昇平十五年為龍驤將軍開府永平郡蓋初
設郡治隱任彈壓藤人之受庇宥者為不少矣藤縣志

隋

裴肅字神封河東聞喜人少剛正有局度仕周釋
 褐給事中士累遷御正下大夫後廢於家開皇五
 年授繕部侍郎遷朔州總管長史轉貝州長史俱
 有能名仁壽中上書左庶子張衡言於皇太子皇
 太子甚不說煬帝嗣位執政者希旨以嶺海荒遐
 授肅永平郡丞甚得民夷心歲餘卒時年六十二
 夷獠思之為立廟於鄆江之浦

祀藤縣名宦

唐

李靖字藥師雍州三原人武德中攝孝恭行軍長
 史擊破蕭銑乃度嶺至桂州遣人分道招撫其大

首領馮盎李光度甯長真等皆遣子弟來謁靖承
 授其官爵凡懷輯九十六州戶六十餘萬詔書勞
 勉授嶺南道撫慰大使檢校桂州總管靖以嶺海
 陋遠非震威武示禮義則無以變風俗乃率兵南
 巡所過問疾苦延見父老宣布德意遠近懽服

書本傳祀縣名宦

元結字次山魏常山王十五代孫少不羈十七乃
 折節尚學事元德秀天寶十二載舉進士復舉制
 科會天下亂浮沉人間國子司業蘇源明見肅宗
 問天下士薦結可用擢右金吾兵曹參軍後為容

管經畧使身諭蠻豪綏定八州會母喪人皆詣節
度府請留加左金吾衛將軍民樂其教立石頌德
罷遷京師卒年五十贈禮部尚書節唐書本
傳祀名宦

尉遲敬德名恭以字行朔州善陽人輔唐太宗有

功出為襄州都督遷同州刺史改封鄂國公貞觀

八年巡察嶺南問民疾苦梧民感其德立廟祀之

至今奉祀不絕

參唐史祀
蒼梧名宦

李曉庭大歷初任藤州刺史時蠻酋梁崇牽據容

州曉庭與經略使王翊進討克復容州民賴以安

杜佑字君卿京兆萬年人以工部郎中為容管經

略使綏懷兵民盜賊不犯多惠政遷嶺南節度使

為開大衢疏析屢閉以息火災朱崖黎氏三世保

險不賓佑討平之召拜尚書右丞又詔檢校尚書

左僕射同平章事元和七年卒時年七十八贈太

傅諡曰安簡

祀名
宦

王翊字宏明并州晉陽人天寶中擢才兼文武科

大歷中拜容管經略使初安祿山亂徵發嶺南兵

隸南陽魯貝貝敗績眾奔潰谿崗蠻獠相挺為亂

夷酋梁崇牽自號平南都統與別帥覃問合又與

西原賊張侯夏永更誘嘯因陷城邑據容州前經

略使陳仁琇元結長孫全緒等皆僑治藤梧翊至
曰吾容州刺史安可寄理他所必得容乃止卽出
私財募士有功者許署吏於是人自奮不數月斬
賊帥歐陽珪因至廣州請節度使李勉出兵併力
勉不許曰容陷賊久獠方強今速攻祇自敗耳翊
曰大人卽不出師願檄州縣揚言以兵爲助冀藉
此聲成萬一功勉許諾翊乃移書義州刺史陳仁
瓘藤州刺史李曉庭約皆進討引兵三千與賊鏖
戰日數合勉檄止之輒匿不發戰愈力卒破賊擒
崇牽悉復容州故地捷書聞詔更置順州以定餘

亂翊凡百餘戰擒首領七十覃問遁去復遣將李
實等分討西原平鬱林等諸州累兼御史中丞招
討處置使會哥舒晃反翊命實悉師援廣州覃問
因合衆乘間來襲翊設伏擊之生擒問嶺表悉平
代宗遣使慰勞加金紫光祿大夫賜第京師

傳祀
名宦

節唐
書本

戴叔倫字幼公潤州人累官撫州刺史惠民化俗
詔書褒美貞元初遷容管經略使綏來蠻俗威名
甚著其治政清明仁恕多方略故所至稱最代還

卒於道

祀名
宦

李復字初陽淮安王神通孫歷饒蘇二州刺史貞元初遷容州刺史充本管招討使先是西原亂吏獲反者沒爲奴婢長役之復至使訪親戚一皆原縱在容三年人賴以安轉嶺南節度使會安南經略使高正平張應相次卒其佐李元度胡懷義等阻兵脅州縣肆爲奸賊復誘懷義杖死流李元度南裔肅然所在稱治徵拜宗正卿

韋丹字文明萬年人歷殿中侍御史元和初爲容州刺史教民耕織禁游惰興學校民貧自鬻者贖歸之禁吏不得掠爲隸始城州周十三里開屯田

二十四所仁化大行後遷江南西道觀察使築堤捍江十二里爲寶以疏漲凡爲陂塘五百九十八所以資灌溉有吏盜倉糧三千斛召而讓之期以一月還得免吏及期無敢違會解官卒後宣宗讀元和實錄見丹治行卓然與宰相語周墀對曰韋丹有大功德被八州沒四十年民思之不忘乃詔觀察使上丹功狀勒於碑

祀名宦

崔方寶元和十年爲容州兵馬使破蠻賊黃探平其黨與獻俘以聞憲宗嘉之

房孺復瑄子幼頗能屬文終容州刺史瑄孫啓素

贅附王叔文貞元末叔文用事除容筦經略使陰許以荆南節帥啓至荆湖宿留不肯進會叔文與韋執誼內忿爭不果拜俄而皇太子監國啓惶駭就鎮凡九年改桂筦觀察使

唐書

鄭畋字治文系出滎陽劉瞻爲宰相薦授戶部郎中入翰林俄知制誥會討徐州賊龐勛書詔紛委畋思不淹晷文成粲然無不切機要當時推之勛平以戶部侍郎遷學士承旨瞻以諫迂懿宗賜罷畋草制書多褒言韋保衡等怨之謂其附下罔上貶梧州刺史僖宗立召還初交廣邕南兵歲運嶺

北五道米往餉之舟多覆敗及畋爲相奏請以嶺

南鹽鐵委之廣州節度使韋荷歲煮海取鹽直四十萬緡市虔吉米以贍安南而罷荆湖等漕役軍

食遂饒

節唐書本傳祀名宦

宋

洪湛字惟清昇州上元人累官右拾遺端拱初伏闕上書請立許王元僖爲儲太宗怒黜知容州容有戍卒謀竊發者湛偵得其實亟斬之容賴以安

遷北部員外郎

舊志無抄通志補入

鄧簡字叔廉杭州臨安人進士及第真宗時特改

秘書省著作郎知分宜縣徙知藤州惟以宣上德
救民患為意興學養士一變其俗祀名

陳執中南昌人咸平中出知梧州不鄙薄其民陶
以豈弟上復古要道三篇真宗異而召之後為平

章事祀名

梁適字仲賢東平人康定中知梧州嶺地南漢時
民間折稅已重轉運使以調不足復欲折之適為
奏免民賴以甦皇祐中為樞密副使儂智高入寇
移嫚書求邕桂節度帝將受其降適曰若爾嶺外
非朝廷有矣乃遣狄青討之賊平帝曰若非適言

南方安危未可知也祀名

狄青字漢臣西河人善騎射歷官至權樞密副使
皇祐中廣源州蠻儂智高反陷邕州又破沿江九
州圍廣州嶺外騷動楊旼等師久無功又命孫沔
余靖為安撫使討賊仁宗猶以為憂青上表請行
自言願得蕃落數百騎益以禁兵羈賊首致闕下
帝壯而許之遂除宣徽南院使宣撫荆湖南北路
經制廣南盜賊事時智高還據邕州青合孫沔余
靖兵次賓州先是蔣偕張忠皆輕敵敗死軍聲大
沮青戒諸將毋妄與賊鬪聽吾所為廣西鈐轄陳

曙乘青未至輒以步卒八千犯賊潰於崑崙關殿直袁用等皆遁青會諸將堂上揖曙起并召用等三十人按以敗亡狀驅出軍門斬之沔靖相顧愕眙諸將股栗已而頓甲令軍中休十日覘者還以爲軍未卽進青明日乃整軍騎一晝夜奪崑崙關出歸仁鋪爲陣賊旣失險悉出逆戰前鋒孫節搏賊死山下賊氣銳甚青執白旗麾騎兵縱左右翼出賊不意大敗之其黨黃師宓儂建中智中及僞官屬死者五十七人生擒賊五百餘人智高夜縱火燒城遁去遲明青按兵入城其爲賊所俘脅者

悉慰遣之歛屍築京觀於城北隅時賊屍有衣金龍衣者衆謂智高已死欲以上聞青曰安知非詐耶寧失智高不敢誣朝廷以貪功也初青之至邕也會瘴霧昏塞或謂賊毒水上流士飲者多死青殊憂之一夕有泉湧砦下飲之甘衆遂以濟始交趾願出兵助討智高余靖言其可信詔許之青旣至檄余靖無通使假兵卽上奏曰假兵於外以除內寇非我利也以一智高而橫蹂二廣力不能討乃假兵蠻夷蠻夷貪德無義因而啓亂何以禦之請罷交趾助兵從之賊平人服其有智略後卒諡

武襄祀名

王次翁字慶會濟南人廣西轉運判官時劇賊馬友等據長沙帥檄漕司預鳩糧芻三十萬以備調發次翁曰兵未必發先憂民可乎吾以一路常平上供計之不啻二十萬足矣已而賊不犯境建炎二年知容州募元結之為人取結在道州時乞免科率二奏刻之下并刻其遺像以便觀省且曰庶不墜元子之政祀名

李亨伯字安正龍溪人紹聖二年知梧州興學勸士卓有政聲歲增俸錢五萬不受建六賢堂以祀

三陳三士七賢堂以祀漢名宦蒯猛等祀名

蕭磐字安國閩清人宣和間權知梧州軍事課農桑興學校百廢具舉暇則引諸儒飲射讀法有古

循吏風祀名

祖世英字穎仲蒲城人政和間進士由知南昌縣通判容州部使者薦知州事卒於任官至二千石無一區之宅十金之產世稱清白吏

陳字莆田人紹興二十二年以大理正知梧州歲旱手書救荒十餘事行屬縣由是米商四集人得不饑留部餘六萬斛建炎盜起增額且半宇累疏

得仍舊流徙來歸獯獯帖然祀名

蔣南金字聲道蘇州人嘉定五年知容州興學校

立貢院在任三年一以教養為事未嘗豫逸祀名

梁介三衢人端平元年攝守容州留心教事增置

學田容人立生祠祀之

譚惟寅字子欽高要人淳祐間知容州建思賢堂

紀元次山等五賢善政倣其行事又於堂之東西

作延老樂山二軒其說曰延老者於此問政也樂

山者因容山以取義也有契於心以靜為德仁者

之事也又嘗論祭禮曰治道不在多端在於致敬

而已舉斯心無一毫人偽則鬼神情狀萬物之理

畢見於以臨政何所往而不當時人以為確論

趙若詵字子振咸淳十年知容州叛賊楊先攻城

若詵與戰力屈死之

李萬淳祐間知藤州有善政嘗訪文簡斷碑刻於

石

權鳳來賓人熙寧九年丁巳科探花歷官蒼梧郡

守至江西副使政事文學咸有可觀開賓邑魁名

之首柳州府志

本州府志 卷之十四 五
劉志行江西人元進士知藤州之鐔津有善政民愛之

臧夢解慶元人至元三十年爲廣西肅政廉訪副使故事烟瘴之地行部者多不躬至而夢解咸遍歷焉遂按問賓州藤州兩路達魯花赤與凡貪官奸吏置於法者無慮八十餘人又平反邕州黃震被誣賊罪反藤州唐氏婦被誣殺夫罪凡兩冤獄夢解剛直廉慎學有淵奧而敏於政事歷官所至以清能著嘗自號魯山士大夫稱不以官而曰魯山先生云

朱國寶寶坻人至元間以管軍萬戶鎮梧州領安撫司事南寧謝有奎負固不服國寶開示信義有奎感悟以其屬來歸於是黎民降者三千戶蠻峒降者三十所

姬明成宗大德七年知容州興學校勸農桑爲政多持大體州人思之

文魁字華甫衡陽人至順三年知藤州兵革之餘披荆棘立州治修城池興學校撫民庶蠻寇出沒而藤獨無擾政化大行祀名宦

馮思齊欒城人至正間知藤州律身廉潔馭下寬

簡民懷其德立德政碑

花禮至正間知容州正風化建學校為民興利卓

有政聲

明

劉鎮浙江人洪武三年知岑溪先是民苦虐政流

移者眾鎮獨尚寬大懷柔安輯教養兼施始作城

池為保障明初賢令鎮其首也祀名

王青洪武初為容州同知寇盜蔓衍民不聊生清

繕城隍立學校撫綏百姓勸課農桑民賴以蘇陞

本州知州祀名

金文仲桐廬人洪武六年以吏部員外謫藤州同

知文章政事蔚然有聲卒於官士民悼之祀名

趙探夫蘇州人洪武七年任岑溪主簿廉慎勤敏

撫輯流離城務修舉百姓思之祀名

趙文字夢得錢塘人洪武時舉賢良七年知藤州

廉以自持誠以待物政尚仁恕秩滿去民言及者

輒流涕焉祀名

何源字幼澄吳江人洪武十年知梧州歲飢僚屬

議請賑於上源曰若請而後賑民其死且徙矣乃

捐俸以拯全活甚眾

羅觀永樂二年知梧州恤民瘼課農桑政尚平易
有古循吏風祀名

余存諒高要人永樂三年知容縣綏流民撫獠獞
時王師征交趾存諒率其部伍運糧民被其德無
逃亡者

劉銘吉安人永樂間判梧州誠信廉明藤縣有殺
繼母者獄久不決忽有蛇蜿蜒來庭下如有所訴
劉曰此繼母冤求伸耶蛇俯首去卒正其法尋以
招懷瓊黎功擢知瓊州祀名

謝有立江西龍州人永樂間令懷集岑溪廉慎公

恕吏畏民懷十年清節如一日秩滿邑人乞留擢

本府通判祀名

彭清浙江錢塘人舉進士永樂十六年知容縣事
先縣無城永樂六年知縣黃昇始城之建立學校
清繼至草昧經營席不暇暖修撰邑志著八景詩
歌風流標致擬之蘇長公寓惠志云

山雲徐州人宣德中命佩征蠻將軍印充總兵官
鎮廣西破柳慶蠻韋朝烈擒忻城蠻譚團討平柳
潯雒容平樂桂平宜山思恩諸蠻初雲以廣西兵
少留貴州兵之來助者至是又言慶遠鬱林諸蠻

非大創不服請濟師乃發廣東兵千五百人益雲
分兵捕潯柳思恩餘寇復攻大藤峽破之雲前後
大戰十餘馘斬以萬計奪還男女二千五百八十
降賊首領三百七十築堡九城四舖舍五百餘區
谿崗猺獐傑猾者望風竄匿居民始復業所駐節
處咨里老撫善良原註誤察誣枉人益感愛之英
宗卽位進右都督上言潯州與大藤峽諸山相錯
猺寇出沒占耕旁近土田惟狼兵素勇爲賊所畏
若量撥田州諸府土兵分界耕守斷賊出路不過
數年賊必坐困報可後東南有急輒用狼兵自雲

始也雲謀勇鷲發而端潔平恕不苟取不妄殺賞
罰號令公嚴有制與士卒同甘苦往時鎮帥初至
土官率饋獻帥一受之卽爲所持卒以敗雲至盡
却饋獻嚴馭之士官皆服調發奉法畏罪無敢違
者正統三年卒贈懷遠伯諡襄毅

李本河南人宣德七年知梧州秉政嫉邪不畏權
勢時中貴督貢方物多妄索輒挫辱守令本至中
使不敢肆人服其丰裁

祀名
宦

李濬海康人正統二年知懷集縣時經蠻寇田野

荒穢濬招集流亡民皆復業尋擢御史

祀名
宦

陳觀湖廣人正統六年知梧州性寬宏崇尚文雅
民有小過犯者多所輕貸豪強玩法奸吏舞文則
痛懲之歲少有水旱卽憂形於色

祀名
宦

雷復字景暘湖廣寧遠人正統中歷官廣西副使
藤縣民胡趙成構猺獞陷縣城復與叅將范信討
斬之成化間累遷右副都御史巡撫山西後卒於
官

王翺字九臯鹽山人累官左都御史景泰三年潯
梧猺亂命翺總督兩廣軍務翺素有威望且建節
督師乃一意推誠撫諭所至猺民率欽服叅將范

信有材畧因事革職奏復其官信卒以能將名歷
官數年清風凜然民甚德之卒贈太保諡忠肅

區昌新會人景泰間任岑溪典史清慎勤敏時猺
寇猖獗地方殘破昌詣潯南召土狼屯連永二鄉
耕守其土爲邑保障民甚德之

祀名
宦

李珙南安舉人景泰間知懷集縣值寇亂盡力保
障得民心秩滿去民咸攀轅買舟送之

縣志

葉盛字與中崑山人天順二年以僉都御史巡撫
兩廣平徭役抑豪右風裁峻肅執法無所阿時兩
廣流賊獞蠻縱恣仇殺所在猖獗守將多以不相

統攝師輒無功盛請於梧州立帥總鎮征蠻兩廣
 各設副總兵及叅將分守要害悉受節制遂檄都
 督顏彪等協力討賊凡破賊砦八百所擒斬數百
 人疏請許鹽商計鹽八粟為邊餉公私利之會朝
 士有言彪圍大藤峽多殺降員濫因以譖盛者取
 還改巡撫宣府成化中入為吏部左侍郎盛清修
 積學敦尚名檢薄嗜好生平慕范仲淹志在君民
 不為身計有古大臣風卒諡文莊祀蒼梧名宦
 袁凱字舜舉華亭人天順間以按察僉事治兵潯
 梧凱善兵每督戰輒疾馳為士卒先賊屯長洲村

官兵遙望有懼色凱麾兵前賊驚引屬去阻水還
 戰諸兵奮擊悉俘斬以歸超遷按察使其在蒼梧
 收上海人周昇孤兒長壽載之歸及長妻之甥女
 里人莫不高其行誼

韓雍字永熙長洲人正統進士授御史天順四年
 右僉都御史巡撫宣大進兵部右侍郎成化元年
 以事出為浙江叅政會兩廣賊寇流剽議大發兵
 拜都督趙輔為總兵官以太監盧永陳瑄監其軍
 兵部尙書王竑薦雍才氣無雙平賊非雍莫可乃
 授雍左僉都御史贊理軍務雍馳至南京集諸將

計方畧議者有謂賊在廣東宜驅在廣西宜困諸將猶豫欲請令遊擊將軍和勇率番騎趨廣東大軍趨廣西分兵撲滅雍曰賊已蔓延數千里而所至與戰是自做也今賊據大藤峽以修仁荔浦爲羽翼若先收二縣以孤賊勢大軍直搗其巢勢無不克巢旣傾餘迎刃解耳舍此不圖而分兵四出賊益奔突郡邑益殘所謂救火而噓之也遂倍道馳全州陽崗苗掠興安擊破之至桂林斬失機指揮李英等四人以徇乃率兵先破修仁荔浦亦定十月至潯州延問父老皆言峽天險不可攻宜以

計困雍曰峽廣六百餘里安能困之分兵則力弱師老則財匱吾計決矣遂長驅至峽口令總兵官歐信等爲五哨自象州武宣攻其北身與都督趙輔指揮白全等爲八哨自桂平平南攻其南叅將孫震等二軍從水路入而別遣裨將分兵守諸隘口賊魁侯大狗等大懼先移其輜重於桂州橫石塘而立柵山南多置滾木礮石鏢鎗藥弩拒官軍十二月朔雍等督諸軍水陸齊進擁團牌登山鏖戰連破石門林崗沙田右營諸巢焚其室廬積聚賊皆奔潰伐木開道直抵橫石塘及九層樓諸山

賊復立柵數重憑高以拒雍等誘賊發矢石度且盡躬督諸軍緣木攀藤而上別遣壯士從間道直上山頂舉礮賊不能支遂大敗先後破賊三百二十四砦生擒賊首侯大狗及其黨七百餘人斬首三千餘級峽有大藤如虹橫亘兩崖間雍斧斷之改名斷藤峽勒石紀功而還分兵擊餘黨鬱林陽江雒容博白次第皆定帝大喜賜敕嘉勞召輔等還遷雍左副都御史總督兩廣軍務雍以兩廣地大事殷請東西各設巡撫帝可之命陳濂撫廣東張鵬撫廣西而雍專理軍事尋以憂歸明年兩廣

盜復起僉事陶魯言兩廣地勢錯互當如臂指相使不可離析近賊犯廣西臣與廣東三司議調兵匝月未決賊益無所憚乞仍命大臣總督便乃罷兩巡撫而起復雍右都御史總督如故雍遣叅將張壽遊擊馮昇分道討忻州八砦蠻及諸山猺獞掠州縣者皆摧破之蠻民素懾雍威寇盜寢息九年柳潯諸蠻復叛叅將楊廣等俘斬九百人方更進而賊破懷集兵部劾雍奏報不實廣西鎮守中官黃沁素憾雍而布政使何宜副使張敷皆銜雍素輕已共醞釀其罪竟致仕去雍洞達閩爽有雄

略善斷動中事機每戰嘗躬親矢石不目瞬尊嚴
示威無少假借兩地鎮守宦官素驕恣亦惕息無
敢肆故能令行禁止而謗議中起卒爲中官齟齬
兩廣人念雍功尤惜其去爲立祠祀焉家居五年
卒諡襄毅

范鏞字彥聲豐城人成化間官按察副使潯梧鬱
林等處寇虐奉督師韓雍檄親抵賊巢諭諸酋長
以逆順望風畏服有流賊猝至鏞督官兵捕殺之
巡至博羅陸川岑溪等縣築城衛民藉以無警改
分巡桂平道未幾潯鬱賊起總督朱英檄鏞往討

賊聞鏞再至驚惶請罪事平遷按察使

龍韜曲江人成化間知容縣閱險設備嚴督戍捕
遊剽以息邑自洪永間屢經兵變民病額輸多鬻
妻孥填溝壑者韜甚哀之率里老赴闕奏請下鎮
臣韓雍勘議檄柳州府同知金廷璽梧州府推官
鄭義履畝覈實得停徵糧米五千六百七十餘石
比舊額蠲五之三自是民始復故業

吳中字時中樂平人成化間知梧州時韓襄毅初
開府軍需旁干處之裕然百廢俱興民不見擾
劉滄巴陵人成化間知蒼梧縣時兵荒流徙撫循

安集俾各得所至今頌之祀名

朱英字時傑桂陽人成化十二年命總督兩廣兩廣自韓雍大征以來將帥喜邀功利俘掠英至鎮以寧靜招撫猺獞效順者定為編戶給復三年於是馬平陽朔蒼梧諸縣蠻悉聞風來歸而荔浦賊李公主有眾數萬久負固亦遣子納款為置永安州處之俾其子孫世吏自是歸附日眾英淳厚然持法無所假與市舶中官韋春不協遂摺奏英專權玩賊按無驗十六年交趾攻老撾議者恐其內寇詔問英處置之宜對言彼不過爭甌脫耳論

之當自悔懼帝從其言果上表謝潯梧高廉賊起偕總兵陳政等分道擊之俘斬甚眾十九年桂林平樂蠻叛復分兵討平之尋召入掌都察院事英在鎮清約威望不及雍而惠澤過之積年儲四十餘萬不以聞或問之答曰此邊臣常分何足言卒

贈太子太保諡恭簡

省志參舊志

劉大夏字時雍華容人宏治二年為廣東右布政使田州泗城不靖大夏往諭遂順命後山賊起承檄討之令獲賊必生致驗實乃坐生者過半遷左僉都御史理宣府兵餉未幾移疾歸復起為右都

御史總督兩廣軍務清吏治捐供億禁內外鎮守
 官私役軍士法嚴令具盜賊衰止後入爲兵部尙
 書以忠直憾劉瑾焦芳輩又數嫉譖之遂假大夏
 先時處置田州岑猛事詔發邊遠充軍瑾誅復官
 致仕卒諡忠宣祀名

區昌廣東順德人宏治六年合懷集慈祥廉謹纂
 邑乘修城池更文廟建明倫堂廢墜畢舉吏畏其
 明民懷其德治行稱第一祀名

林元瓊山舉人宏治六年訓藤以易學造士九載
 陞學錄

蔣聰東莞人宏治六年任岑溪教諭老誠慎重勤
 於啓迪講論正學無計功謀利之心後人思之
 余敦善靖安人宏治七年任岑溪治官如家多善
 政改陽城爲陰城役民而民忘其勞卒於官士民
 思之

張吉字克修餘干人宏治八年知梧州省繁費不
 均之徭隨時釐正崇尙正學政教竝行民有徙者
 皆相率而歸尋遷廣西按察副使備兵府江申教
 令嚴武備察奸吏擇將領次第兼舉推誠御下以
 意創鴛鴦銃偏架弩教士練習沿江山盤林翳設

謀控治使賊不得藏伏又以府江東西二賊爲犄角而東賊剽悍尤甚遂併力於東數月之間斬獲甚衆由是西賊聞之亦皆自戢府江以寧祀名宦詹志文孝感人舉鄉書宏治間任蒼梧典史端謹有爲不詭隨媚世上下重之久之嘆曰與其糜祿屈人孰若適志自樂遂棄官去

陳夔香陽人宏治十五年任岑溪教諭廉介嚴勤足稱師儒之任去後弟子思之

徐珙海陽人宏治十五年以鄉薦司府訓剛方嚴正士類信服學宮後有五顯祠珙曰此何地而得

以淫祀逼處乎立毀之會二子相繼卒或以爲祟曰天命也鬼能禍福哉終不惑

曹琚字仲玉郴州桂陽人正德六年由廣州知府調知梧州時都御史陳金總制七省調狼兵征江西寇惠潮又方有事總督林廷選難之以問琚琚曰江西寇株連閩廣功過與有歸矣宜速遣及江西平惠潮亦奏捷林受賚以是知琚能妖賊李通寶竊發檄琚巡諸邑會北流已陷殺鬱林署印官擒巡捕通判以去林促琚歸引入問計琚請選鬱兵之壯銳者追之而留其老弱居守又曰從征江

西狼兵在河下出賞格以爲梧兵助萬全之計也
林因屬琚督軍遂偕諸將行聞賊在陸川冒險追
之連戰皆克謀知賊必遁黃山卽抽兵伏黃山下
夜半賊果至伏發擊斬五十餘師駐鬱林林令大
軍爲援通寶來攻狼兵又敗之賊黨逃散獲通寶
於廢圃中斬之餘黨悉平出令招民之脅從者給
牛俾耕選其子弟入學時學宮城郭官舍焚毀殆
盡琚隨命工繕治未幾竣工民不知費又建議復
鬱林守備

孫懋字德夫慈谿人正德間以論朱彬謫藤縣尉

創南麓書院藤人尸祝之嘉靖中累官廣西右布
政使力剋奸蠹汰冗費而人又服其雅量

祀名
宦

王啓字景昭黃巖人正德間爲逆瑾誣謫知容縣
後陞布政使世宗登極與右叅政黃衷奏言廣西
稅糧初四十二萬有奇頃以人民逃散及土官不
服輸納歲實徵止二十三萬有奇而宗藩及官軍
祿糧且過三十五萬將何以支上命發鹽銀五萬
兩濟之初中官鎮廣西歲以零陵香進上雖詔却
諸獻而廣西徵貢如故至是啓請罷之仕終副都
御史

張拱樞興國監生正德十二年知岑溪寬以蒞民
嚴以待下囹圄空虛廳事肅然秩滿去士民懷之

祀名
宦

石希介成都人正德十四年令岑溪性慈惠勞心
撫字築外城以奠民居嘗欲鑿瀧水以通舟楫因
改任未果百姓思之

祀名
宦

王守仁字伯安餘姚人嘉靖六年思恩田州土酋
盧蘇王受反總督姚鏌久不克乃詔守仁以原官
兼左都御史總督兩廣兼巡撫守仁抵梧州上赴
任謝恩遂陳膚見疏切陳用兵之非且言設流官

之誤及至南寧蘇受遣使乞降守仁命詣軍門諭
二人薄杖而釋之親入營撫其眾七萬奏聞於朝
陳用兵十害招撫十善因請復設流官量割田州
地別立一州以岑猛四子邦相為吏目署州事而
於田州置九巡檢司以蘇受等任之并受約束於
流官知府帝皆從之斷藤峽猺賊上連入寨下通
仙臺花相諸崗蠻盤亘三百餘里郡邑懼害者數
十年守仁欲討之故留南寧罷湖廣兵示不再用
伺賊不備進破牛腸六寺等十餘寨峽賊悉平遂
循橫石江而下攻克仙臺花相白石古陶羅鳳諸

賊令布政司林富率蘇受兵直抵八寨破石門叅將沈希儀邀斬逸賊盡平八寨條陳八寨五屯善後諸策守仁去後猶見施行隆慶初贈新建伯謚文成賜葬祭

郭仁龍溪人嘉靖六年司府訓操行廉介同郡人林潤客於梧病篤以二百金屬仁治後事曰餘以謝也林卒仁捐金治棺殮殯寺後募僧守之書召其家人不至明年仁病且瞑急命其子薦以林屬銀寄官庫封識宛然督撫林富義之特表其墓

劉士奇字邦正順德人嘉靖七年知梧州仁明廉恕廷無留獄字民惟恐傷郡故多竹舍連歲四罹火患出帑金爲民築牆垣以避火吏收支多侵牟者爲較正法焉後遂按爲格嘗刻定性書揭理學本源以變化多士民有盜庫銀者訊不服立命搜出之發奸摘伏合郡肅然累官山東布政使

翁萬達字仁夫揭陽人嘉靖中守梧州仇鸞鎮兩廣縱部卒爲虐萬達縛其尤橫者杖之鸞爲斂戢閱四年聲績大著會朝議將討安南擢萬達廣西副使專辦安南事萬達請於總督蔡經曰莫登庸大言中國不能正土官弒逆之罪安能問我今憑

祥州土舍李寰弒其土官珍思恩土目盧同煬九
 司亂龍川土舍趙楷殺從子燧煖又結田州人韋
 應殺燧弟實斷藤峽猺侯公丁負固此曹同惡共
 濟一旦約為內應我且不自保曷先擒數人間罪
 安南易下耳經然之於是誅寰擒同招還九司誘
 殺楷佯繫訟公丁者給公丁執諸座以兩軍破平
 其巢又議降尚豪黃賢相登庸始懼會獲安南謀
 者丁南傑萬達解其縛厚遣之怵以天朝兵威登
 庸大懼詣鎮南關乞降毛伯溫等承制許之萬達
 功最賞不逾常格然帝知其能兩為軍務尚書隆慶中追諡襄毅

梧州府志卷之十五

名宦志

宦蹟下

朱鴻漸吳縣人嘉靖十八年知梧州出納必親奸
 胥不得售其蠹輸羨餘以資公帑修葺學舍躬勤
 課講時征交南兵過境注措有方民不知兵累官
 福建布政使

吳必學字以思延平舉人嘉靖二十年任容縣教
 諭啓聖無祠捐俸建之又置文廟爐鼎籩豆百十
 餘器列科貢題名於堂左右課諸士最篤遷知亳

州九江二守容士懷之爲立石

翁世經字可直福清人嘉靖二十四年知梧州治
尙節簡約已裕人加意學校平衢道修府庫立三
關寨百廢俱舉秩滿去闔郡思之

章熙字世曜海陽人嘉靖中以按察司僉事分巡
蒼梧多有釐舉白馬三洲故險道也江道逶迤林
木深阻諸蠻久窟爲患熙至下令調集諸路營兵
統以偏裨而躬履其地度其地勢高下而隨刊之
盡伐其樹赭其山分兵守焉自是諸蠻不敢復出
邱雲霄崇安人以歲薦嘉靖二十五年任府學訓

導學問該博督學謝汝槐檄修省志擢國子監典
簿令柳城縣所至有聲嘗著止山集尺牘抄行

劉陶廬陵人嘉靖二十九年知蒼梧縣廉潔而嚴
愛民如子時民任館庫里甲之役蒼梧當孔道者
辦無休日陶獨毅然絕交際卽歲時於上官無私
覲聽斷明允不以權勢骫法遇攢造躬較版圖盡
剔諸弊民賴以安

王鳳吉水舉人嘉靖二十九年令懷集政從寬大
治尙嚴明秩滿陞武岡知州懷民德之

張佐莆田人嘉靖間以鄉薦任懷集教諭學行純

篤模範端嚴丕振士習尋擢荔浦令

劉教字道夫廬陵人嘉靖三十三年知梧州府有清操裁一切供億冗費以行義見重於時魏一恭譚大初雅尙風節亟稱之

翁堯英晉江人舉鄉薦嘉靖三十六年爲懷集令葺學宮以課士修橋堰以利民尋擢寺丞士民頌焉

石銘長樂人舉賢書嘉靖三十六年署府學事標經史大義啓迪諸生絕不與戶外事尋卒督學陳善治躬祭其柩曰才足以仕而不利其官德足以

壽而不永其年已焉哉夫固命之窮也已

李時晉安人嘉靖三十七年任岑溪教諭莊敬嚴毅不可干以私愛士如子勤於啓迪卒於官紳士思之如失所怙崇祀之外復有專祠

蕭信潮陽人嘉靖間任懷集教諭善屬詞端已勵俗日與諸生講正學明心性置學田以贍貧者至今稱爲蕭學田云

李鵬舉歸善人嘉靖三十九年判梧州政務嚴明人不敢欺革釐倉弊解戶無虧公暇進諸生講心性之學署容縣懷集縣增置學田造士養民多善

政

揭啓南豐人嘉靖四十五年任岑溪明敏有爲綽有風裁時乃隆猺覃公位盜民牛執而戮之諸崗股栗孔亮猺駱扶陰等爲質乞降公請給以衣布各猺爭先効順

梁佩高要人嘉靖間爲容縣司訓敦本實忘機械祭祀俎豆躬自陳設必誠必敬士有貧乏多周卹之

莊宇毅晉江人容縣訓導隆慶元年任持已嚴正舉動足法庚午領鄉薦除北流知縣

殷正茂字養實歙縣人隆慶初古田獞韋銀豹黃朝猛反銀豹父朝威自宏治初敗官兵於三厄殺副總兵馬俊叅議馬鏐正德中嘗陷雒容嘉靖時銀豹及朝猛劫殺叅政黎民表提督侍郎吳桂芳遣典史廖元招降之遷元主簿以守而銀豹數反復隆慶三年冬廷議大征擢正茂右僉都御史巡撫廣西正茂與提督李遷調土漢兵十四萬令總兵俞大猷將之先奪牛河三厄險隘諸軍連克東山鳳凰寨蹙之潮水廖元誘獞人斬朝猛銀豹窮令其黨陰斬貌類已者以獻捷聞改古田爲永寧

州設副使叅將鎮守建委官運鹽之議以其息充軍餉綜理詳密軍需賴以不匱終明世增損其法而行之卒莫能易會僉事金桂捕得銀豹正茂因自劾詔磔銀豹京師置正茂不問尋代遷提督兩廣軍務會廣西巡撫郭應聘亦奏平懷遠雜容猺正茂以功累加兵部尙書祀蒼梧名宦

林梓福建漳浦人隆慶五年守梧州歲荒賑禦有法民無死徙以艱去累官通政使蘇湖雲南人隆慶六年知藤縣清欺隱興學校申飭鄉約復行條編訓民子弟招撫猺獞潔已愛民

政教煥然一新以外艱去士民爲立祠

陶之欽臨桂人隆慶間以鄉薦爲懷集學諭立師範維士行敦義明禮有胡安定之風

陳一定揭陽人萬歷二年由瓊山教諭擢懷集令勤撫字緩催科修建學宮課士日繼廩庖增置學田以資膏火養老月給粟帛剔奸禦盜政績偉然伍可受清流人萬歷丁丑進士五年任容合居政詳明慎密頓興百廢於學校尤有功十年行取擢南禮科尋遷山東分憲

陸萬垓字仲鶴浙江平湖人萬歷七年知梧州府

清慎慈惠擒撫猺蠻闢東安西寧二寨興學育才
府治火萬垓躬爲經始百度維新

林春茂閩縣人萬歷八年知懷集縣值金鵝猺亂
大肆鴟張春茂請兵勦平時詔清丈以懷足額力
請免量民得不擾請減鹽餉二百四十兩商民稱
便

李曰巽字順之長樂人萬歷十一年知蒼梧縣廉
正明允減差役免災米修書院社學邑人感之

吳文華萬歷十二年由廣西巡撫總督兩廣爲治
持大體務與休息嘗作殘墨二戒以訓官屬幕府

肅然討平府江賀懷盜人服其威

周宗道廣東澄海人萬歷十三年知岑溪縣時猺
賊新平留心安撫減額徵置官驛建學宮以興士
類祠丁孝子民夷向風卒於官民爲立石祠祀
林喬楠晉江人萬歷十三年知梧州府綜核政務
尤切拊循蠲水火災米豁清丈重稅賑傷殘通糶
糴處置有條民蒙其惠擢本省副使

宋茂栢海陽人舉鄉書萬歷十四年知懷集縣善
政得民以艱去遮道哭送立遺愛碑起補博白冰
蘖不移復丁艱去家居一貧如洗

仇順方順德人以鄉薦萬歷十六年任容邑令與學校行鄉約平里甲革坊廂不用操切而政勤事舉得蒙清苦之褒官至南戶部郎中

吳善字元夫龍溪人萬歷十六年以廣西巡撫晉兵部侍郎總督兩廣下車首禁屠牛賑恤荒歉清虛糧捕曠餉廉逋賦核僧田凡苛條悉從報罷而責成吏治尤蒸蒸切也故事兵餉歲羨數千隨幕府出入不問銖毫悉登官籍其廉靜如此卒於署士民思其功德請合祀於吳桂芳祠

蕭彥字思學涇縣人萬歷十九年總督兩廣廉潔儉素軫民艱食奏請蠲賦而輸梧關稅羨以資國計邊防籌畫周悉卒於官

陳大科字如岡通州人萬歷二十一年出撫廣西會田州土官告蠻叛授計右江道討平之上善後七策大要以弛征撤戍柔懷新附爲本又岑溪七山等山獍嘯聚復授計左江諸道討平之已而疆外蠻黎莫二姓構兵請於朝爲布立恩信以術招徠二姓皆請降

林茂槐福清人舉進士萬歷二十四年司理梧州聰穎過人是非立辨性嗜學手不釋卷進梧人士

木州府志 卷之十五
課藝多所成就

曾莘六合人以歲薦入太學萬歷二十五年知岑溪縣博學多才愛民重士興利除害百廢具舉城池學校祠廟皆公修創勞績最著及去任士民思之

王一道潛山人萬歷二十五年任岑溪典史廉慎有爲奸暴屏迹建城有功陞昭平主簿尋卒士庶思之

凌嗣音浙江烏程人萬歷二十七年知梧州府清靜平易當岑溪北陀大兵後兼助大工中瑞權稅

嗣音爲先事綢繆裁節有方人心遂安

劉炅江西南昌人萬歷二十七年知藤縣與民休息捐俸建學造士稅瑞起藤蒙三江稅於五屯採金人心皇皇炅與太守凌嗣音力爭其弊強項不屈

陳煥臨海人萬歷二十九年知懷集縣重學興文軫恤民困除耗羨修陂塘盡力田畝凡饋膳所須必同民間給直時議運官鹽煥以懷民素不習舟楫懇爲申免士民建祠以祀

吳宗教武陵人萬歷中知容縣縣多毒草民以小

木州府志 卷之十五
隙輒服草傷命宗教訊必反坐又捐俸每兩約納
毒草有根者若干朔望焚之毒草遂絕歲旱飢糴
米於鄰勸富戶出粟賑活多人

黃流芳字若瓚博羅人萬歷間官廣西按察副使
宜陽天河縣爲土司蠶食邊界下檄責其罪狀土
酋惶恐不敢擾柳慶間多劇盜率諸軍削平之進
叅政部蒼梧首飭軍政境內肅然在官以廉節自
敦文武將吏無敢以餽遺進者嘗語鄒南臯曰非
敢異物率吾性耳

攷通志
補載

李沐宜山人萬歷間以恩貢授梧州司訓遷懷集

學諭舉動可風修學置田有文詞行世陞河陽令
卒配祀文昌

張聞性萬歷三十七年任岑溪令甫下車詢民疾
苦痛革里役諸弊民困得甦

謝君惠將樂人萬歷四十四年知懷集縣保赤愛
民重修學宮建文昌書院爲治振刷糾紛奸不能
眩邑人有青天之譽擢刑曹復以郎中出守梧州
剔弊汰冗清聲尤著

陳鑑石屏人萬歷四十五年知梧州府甫再月梧
城大火城內外公私廬舍俱盡鑑徒步周詢所賑

以千餘計皆出橐中及借公帑時有乘機夜掠者
 捕獲以軍令徇民乃安是年粵西復大稔柳慶橫
 邕潯梧稻盡槁諸郡殍死相藉鑑發倉粟平糶盡
 則以價轉糴東省接濟民食闢梧陽書院以教十
 屬生徒修護堤防浚鱷魚池瀦蓄其水為學宮後
 莫在任四年陞潯州分守道去郡人建祠祀之

祀名
宦

陳熙韶南海人舉鄉薦萬歷四十七年同知梧州
 府學問該博靜重端方言笑不苟事無大小必詳
 慎周悉署府篆一載一遵成法不事更張權厥稅

僅足額而細稅悉捐商民德之梧郡舊志皆熙韶
 所論定以存文獻有功來禩云

詹子忠莆田人萬歷四十八年任岑溪令愛民重
 士遷學回城士民懷之

梁子璠南海人天啓二年知蒼梧縣逐積蠹革陋
 規凡供役病民者悉請裁省郡舊為陰城樓廊燬
 幾盡復建則益病民子璠請撤朽敝修築完固改
 為陽城興學造士以品行為先聽斷明允而不為
 深刻院司知子璠廉介委之權稅正額外毫不自
 潤後擢御史以論事杖戍尋放還歸

祀名
宦

楊崇忠懷集令先是八排猺構亂天啓元年總督張請征勦委都司蔡一申討之一申偽報捷班師四年排猺糾合將乘東省八月鄉試官員八場順流攻廣州連山崇忠偵知之討擒渠魁餘黨解散西省并賴以安

攷懷集雜志補入

王用霖南康人天啓四年任岑溪令有惠政士民建祠祀之

李邦才鶴慶人天啓六年知懷集縣凡鹽課陋規河厰羨餘匱額加耗盡報院司秋毫無取值猺寇謝龍崖倡亂單騎入嘉崗營以計擒斬之境賴以

安尋卒

蕭聞宇太寧人崇禎三年知懷集縣多惠政時歲饑民逼穀商將亂聞宇借帑糴穀貯公所任民平糴不足又發倉厰穀賑之商民並感

章金鉉漢川人崇禎五年以御史出知梧州府公明剛介綱紀振肅而不為深苛士農商旅各安其業有循吏風

姚張斌字憲卿臨川人崇禎八年任蒼梧道政事詞訟裁斷立辨而好學不輟圖書外無長物清節卓行人咸稱之

木州府志 卷之十五
二
衷崇寅南昌人崇禎九年任梧州推官公明敬慎
案無留牘每一事必洗心滌慮究悉周詳故大讞
多所平反常自謂敕罰之司稍涉輕率則故入故
出之咎不能自免於心舊例府僚歲理廠務一季
崇寅以職司明刑不關錢穀辭讓之其清介有足
稱者

張鏡心字湛虛河南磁州人崇禎十年總督兩廣
平諸蠻寇功鐫兩粵碑有平蠻紀事八卷

金九陞字允訥全椒人崇禎十二年任蒼梧分巡
道時尚猺豕突於北流信宜之界東省官兵敗走

之復反於西焚掠鬱林北流總督張鏡心令九陞
會勦九陞偵知賊巢卽督鬱林知州劉履丁北流
知縣張問士會同弁目直趨鳳凰山口先後擒獲
滿朝哥等一百九十餘名殺傷無算殲厥渠魁餘
氛盡滅復葺瑞泉書院故址以課諸生崇禎十五
年調上荆南道復會三省合勦八排猺尚九陞監
軍督餉勞績最多以病乞致仕去

汪德元歙縣人崇禎十五年任蒼梧縣省刑罰絕
苞苴目擊民艱憂形於色時楚三藩避寇八梧德
元調護禮敬備至衛兵驕悍則挺身扞禦禁其暴
虐賀縣土寇起郡戒嚴叅將出師防禦境上德元
往來餽運糧餉拊循百姓賊撲滅城中乃安
李聯芳崇禎十五年知懷集縣時賀寇蹂躪後哀
鴻甫集聯芳至立清奸蠹民賴以安一切供應皆
自辦保長里甲終歲無追呼折獄三年無冤民方
離任民建生祠尸祝

蔡雨東莞人以鄉薦知容邑修城池更文廟建明

倫堂學舍宮牆煥然一新

國朝

沈倫湖廣天門人己丑進士順治八年知梧州府
慈惠溫良操持剛介時梧州初闢百姓逃匿瘡痍
未起倫多方招徠民漸安集未幾六師征討倫悉
心經理不以絲粟累民又時時爲鎮將開誠婉諭
調劑輯和故地方卽甫定而百姓安堵皆倫之力
也政事暇輒進諸生課藝獎勸多士翕然向風僞
安西寇梧籌畫勞瘁力竭城陷不屈而死

瞿鶴齡江南鹽城人順治九年知岑溪縣廉慈愛

物勤於政事時當兵荒之後地方殘破公戢兵保民人甚德之

陳上年字祺公清苑人順治己丑進士歷官廣西參議奉繼母孝友於兄居無私蓄逆寇破梧州迫以官毅不屈困以死事

聞優恤

畿輔志

張繼曾貴州舉人順治十二年以儀制司郎出守梧州練達有爲冰蘖自矢凡屬寮餽獻槩擯絕之是時兵戈未靖差務殷繁繼曾詳請優免雜派減省差役民困得甦任三載卒於官僕從僅二人有

司檢其囊篋蕭然無長物士民思之

田昇龍奉天人順治十四年以監察御史巡按廣西未至先微行各屬得民間疾若狀甫下車卽疏陳粵民重困凡包攬鹽埠勒抑土官營債准折諸大弊立除之勒石以禁時旗弁有強佔民田奪人子女者力爲查還不畏強禦藩鎮兵皆目爲鐵御史素性淡泊食無兼味巡歷所至從人不過數人民有訴必召令面陳平易無厲容人得罄其始末惟糾彈貪墨不少貸郡邑都憚之風清弊絕民困

頓蘇

節通志

閻政直隸真定人壬辰進士順治十四年任梧州
司理言動謹恂風裁峻整興學校教明刑敕法上
下肅然嚴示署門凡歲時一切餽獻不許通刺巡
按田昇龍行部至梧知政剛正檄與俱按逮積蠹
五人論如律又署縣事馬自定貪污狼籍政具揭
題叅當事有欲曲庇之者政不爲屈如其罪遣戍
之鎮標占據城中民屋政詳懇巡按疏請給還悍
將猶有難色政毅然出示民得復業署府篆革去
錢糧重耗出納惟允胥吏不敢欺罔在任四年興
利革弊必中民隱擢戶部郎去闔郡百姓攀轅泣

送

劉廣國字寶生湖廣潛江人已丑進士順治十四
年知岑溪縣時地方屢遭土鎮殘害頻年不耕民
採蕨根充食多餓死者廣國臣買米以賑給牛種
俾墾荒田闔邑熟糧不滿五百石而逋者皆鳩形
鵠面惻然曰吾何忍復以催科累此窮黎遣家人
歸取數百金代償之士子應考悉給卷資路費蒞
岑二載士民懷之

許重華河南太康人壬辰進士順治十五年令懷
集果決明敏聽訟片言立折其馭下甚嚴而撫民

極慈時猖獗出劫親勦捕之凡公務詣府單騎往
唯一二僕從自隨蒞任三載不用民間一夫懷人
至今思之

陳緯山東臨朐人戊戌進士順治十八年知蒼梧
縣慈惠廉潔遇事剛果敢爲蒞任數月有巨豪以
奸事行毒殺一儒生緯鞫其實具獄上申豪大賄
當事強釋之緯復取置之法人皆稱快再期卒於
任其子思靖奔喪至邑人歛金以賻輒始得歸
楊廷耀奉天人康熙四年任梧州通判時盜風肆
熾官餉往往被劫廷耀密訪計擒土賊唐三蠻等

俱就戮盜患遂息分權梧關刊定稅貨則例按往
來船戶人給一紙吏役乃不敢苛索署容縣事省
刑薄歛興復學宮與士民更始偽安西李定國餘
黨竄竊大容山連結猖獗出沒不常廷耀復以計
擒逐遠近帖然逃氓復業者如歸市

唐鳳字羽雲廣東潮陽人康熙七年以都司僉書
守賀縣軍法嚴明桂嶺諸猖獗憚之孫延齡附吳
逆叛鳳詣督府陳破賊方畧督府令以援勦遊擊
鎮岑溪時偽檄紛馳土鎮蠡起鳳破斬其偽總兵
林萬勝孫雲客於藤縣義昌鄉敗其偽總兵王邦

相張宏等於容縣波里民賴以安鳳素得士心且
平易近人鄉人來見者與之酒食衣服訊所在形
勢故敵情每先見之所向輒勝後卒於官

劉昌言字禹度江南山陽人己亥進士康熙七年
任岑溪令寬恕愛民催科有法作四單輸糧吏胥
不得爲奸革重耗免雜派禁服毒息訟寧人妖賊
馮四彭奇爲亂輒討平之陞宛平令未赴卒士民

懷之

祀名宦以
上舊府志

黃裳吉曰治邑而聽輿誦君子猶疑其諛也至
解綬而廛去後思世遠而謀庚桑祝非有大功

德於民安得此報於俎豆間哉梧郡邑之祀名
宦者代不乏人今採列傳而嘆梧多良吏焉其
最盛者如陳稚升之囹圄恆空陳臨之惠及囚
嗣執中之陶民愷悌張吉之期士聖賢庶幾哉
以德化民之遺乎他若李亨伯光崇賢祀陳宇
條行荒政劉士奇翁世經捍禦大患林喬楠之
免災稅豁重編陳鑑之誠心恤民加意造士政
蹟昭然矣而發廩賑饑何源之舉不殊內史却
羨歸帑何異懸魚肩輿折中使之貪婪李本其
有勁節與纂修存一郡之文獻陳熙韶謝君惠

具有遠圖也外此而揆文奮武興利革弊或宣勞於軍興之時或流惠於昇平之世無論守擬龔黃令齊卓魯而僚佐師儒一命之士位即卑小既賢且能咸可表敘故自漢而下迄於國朝有品行高潔政事卓異當時歌頌去後見思者皆得而傳之前模具在奕世流芳後之從政者又可繼此而興矣

按康熙八年妖賊馮四彭奇倡亂攻破容城掠及岑境時知縣劉昌言城守徐國才典史蔡鵬脅力攻擊賊遂退諸生羅天業計擒四奇械府

斬之餘黨悉散事載岑志今攷舊志縣志昌言有傳國才職官名下亦畧載禦寇事而蔡鵬并軼其名天業亦莫為表而出之者因并攷核補載分著於編

蔡鵬不知其籍任岑溪縣典史善騎射有謀畧康熙八年妖賊逼岑境勢甚洶鵬謂昌言國才曰是不可不先奪其氣發一矢射其旗落之賊驚而譁國才乘機衝擊遂克之妖伏其神箭云又有俞綸者容縣大崗巡檢也容賊楊彪作亂劫掠波里綸追捕至岑溪六告山伏發遇害岑人哀之為立祠

事在康熙三十六年

見岑溪大事志

按典巡微員耳而功在生民卽名重彝鼎蔡鵬雖遺舊志俞綸尙有傳聞例得合傳允足繼迹不區昌媿美俞鑲矣

徐國才岑溪城守把總也妖賊馮四彭奇搆亂寇入岑國才與知縣劉昌言典史蔡鵬禦之時賊假妖術惑人稱能遣紙人馬及驅縱虎狼食人獠獍信從者衆勢甚猖獗國才挺身奮擊手刃數賊遂披靡逃散及羅天業捕獲渠魁問其能作何術曰本烏有耳賊平餘黨悉散歸業岑容間民並德之

先是有吳應龍者懷集城守千總順治十七年土賊劫歐岡應龍救之賊遂退據黃姜聚營堅壁又破之康熙元年春懷集土賊盧英劫撒村應龍敗之賊計窮卽就撫

按城守官弁之職雖非將領而責任地方所恃以衛民者至近且切也讀劉楚傳其英風義氣千載如生事幾泯沒不彰矣而通志特爲列傳至今談者色起徐國才吳應龍皆任城守而能奮勇遏寇干城之寄復何慚焉補舊志所遺故連類而書之又附錄容人植廷紀遺誌條載康

熙七年八月初七日水源賊首彭奇統賊七百餘人逼城西而營城守羅忠與其壻帶兵二十餘人迎戰陷陣中壻被殺羅忠乃戰出重圍入民舍借民簞笠貌農人欲間道入城計復戰而知縣沈希畢已棄城走賊遂入城忠卽星夜奔潯州乞師得援兵三百擊之賊乃散後忠竟以棄城失守獲罪一時傳報之未實也

馬雄鎮字錫蕃奉天左衛人起家任子歷官僉都陞國史院學士

特簡巡撫廣西甫蒞任值群寇煽亂於左右江平梧諸

郡擁衆數萬雄鎮勦撫並行計斬渠寇楊其清等賊衆瓦解首清鹽課蠲權稅建學勤民剔奸薶壹九郡晏然康熙十二年冬滇逆構禍孫廷齡殺其都統佐領以附逆雄鎮密檄提督馬雄潛師會勦雄遷延不至因蠟疏具狀遣子世濟世永間道入京乞師廷齡訶知一夜發兵圍撫署脅以死陷以爵皆不爲動因羈繫以邀其從後逆賊吳世琮趨桂林執之詣賊營雄鎮詈罵不屈遂遇害闔門死者百餘人

敕贈太子少保兵部尙書賜祭葬諡文毅後巡撫都御

史郝浴疏請建雙忠祠祀之其幕中賓客同與難者有朱昉李子燮一為江南人一為江西人又陳文煥上虞人與大興孫成亦同在幕當雄鎮幽囚時文煥等義不忍去甘心械繫患難相周旋者四載康熙十七年

王師下蒼梧文煥脫奔白其事於巡撫傅宏烈據情
八

告奉

旨嘉其忠蓋從優議敘授安邱知縣

屈大法督標副兵官也康熙十三年偽總兵緱成

德率師攻梧州時知府楊彥溶城守中軍王邦相皆賊黨人心惶懼桂林藩督兵會擊賊暫退議委屈大法守梧州城大法相機宜於石英山樹柵開塹與府城犄角分兵駐守哨船列礮石防備嚴密寇不能入大法招集潰兵撫綏百姓人心乃安梧城得以保障屈之功也梧人至今稱之

羅文舉永定人初任廣東千總累立戰功擢廣西梧州守備康熙十四年寇犯藤縣奉調應援奮勇殺賊陷陣而亡事

聞贈官子祭給葬銀三百兩官其子一人

傳宏烈字仲謀江西進賢人擢守慶陽逆藩吳三桂潛謀不軌宏烈探知狀首發之鞫訊者阿三桂竟誣坐以辟繫獄尋蒙

恩宥得減死戍蒼梧無何三桂叛閩越湖南相繼淪陷宏烈召募義兵出龍南庾嶺東迎

王師諸反側聞風歸正

上嘉宏烈忠悃

特簡巡撫廣西佩撫蠻滅寇將軍印宏烈智計泉湧分兵四出遂復梧潯郡縣數十城晉秩太子太保已未秋全粵底定猶以雲貴未平誓滅渠魁三疏辭

撫篆選甲厲兵進討取道柳州柳降將馬承蔭驚悸邀計機宜諸將校知承蔭叵測力阻其往宏烈曰吾素撫柳帥厚柳帥既許我前驅倘蓄疑大事不集我推心置渠腹中渠恐有是乎竟單騎往爲所執械送桂陽作絕命詞絕粒詈罵遂遇害宏烈前後請留中密疏如預陳尙逆反情布置投誠官兵及籌畫勦撫機宜皆洞中肯要歿後特奉

溫綸昭示忠悃盡下其前後諸疏布諸中外

敕贈太子太師子祭葬諡忠毅巡撫都御史郝浴因紳士公籲大忠疏請建雙忠祠偕馬文毅同祀於桂

林省城梧人亦祠祀之

張仲璜字半玉漢陽人由歲貢生康熙二十七年授梧州府同知潔已愛民尤加意於弭盜時古雍第天容山巨盜陸亢登等憑險出沒數爲民害仲璜甫至密計擒其渠魁置之法餘黨悉散民賴以寧未幾以父憂歸

俞鑲浙江紹興人任容縣大崗司巡檢康熙丁丑廣東賊禾倉二烏肉蛇嘯聚岑溪六垢山兩縣約期會勦而賊劫該司古例村擄其民鑲率兵勇卽追至六垢與戰殺四賊乘勝追之賊設伏山間鑲

力戰而死狼總黃秀榮與狼兵弓兵五人奮勇救護皆戰死村民歲時祀焉

潘名世康熙三十七年知蒼梧縣政尙嚴明吏胥畏服捐俸倡建縣學文廟多士感之

安自治臨桂人康熙二十八年教諭蒼梧廉靜自持善於訓誨捐俸助建文廟督率與有功焉

呂猶龍字雨邨正紅旗人康熙三十九年任岑溪全岑接壤粵東流匪往往逋藏煽誘地小而稱難治猶龍潔已愛民四境胥悅會母疾詳乞歸養巡撫彭鵬重其才有豹見一班及不愧爲民父母之

語爲具疏以請調知博白博邑多陋規民雖重病而因仍供億莫敢言猶龍蒞任甫兩月訪悉民隱凡現辦換票拆引加耗諸弊政列欵具詳禁革鎮以廉示以信惠威交摯一如岑溪治行爲一時最晉秩去兩邑士民至今懷思不置

潘明祚山東進士康熙四十一年爲藤縣令教養兼修清白自矢縣舊例有納糧外索二分之費吏役承管公堂之需又有供應柴炭查封民船挨點戶冊取辦祭品以及蛋戶漁稅民夫幫錢種種苛累明祚之任概行詳革勒石永禁民困以蘇

張庚曜順天大興人康熙四十年以進士任岑溪時有容縣賊楊彪者潛入連城鄉青墨山肆行劫掠山卽僞總兵陳選故巢南連信宜西北跨蒼梧容縣深菁窳谷搜捕爲難自康熙三十五年起剽掠無虛日西南連城三鄉被害最甚庚曜下車卽力圖撲滅且撫且勦賊負隅拒戰越二載乃獲楊彪法斃之餘黨悉散邑志云至今士民安堵張之功也

張維遠字德侯奉天人康熙四十三年任分巡右江道右江蠻獠雜處夙稱難治維遠多方開導務

令家喻戶曉由是民風丕變寇盜寢息以其俸入之餘設義學賑飢民尋遷蒼梧驛鹽道剔弊除奸禁絕私販商有餘貲引不壅滯本實心行實政民勉淡食之苦茹蘗飲冰清操益厲表率屬員皆勉爲廉吏云

張義雲南新興人康熙丁卯鄉薦四十三年授岑溪令蒞任後卽詮釋

聖諭十六條按日詣鄉集士民親爲宣講農夫牧豎無不領悟操守廉介處事明決革排門月夫諸陋規以除民累有告訴者卽日剖斷勿令伺於縣門胥

役無間可乘故貧民之冤易白而訟師不能逞其奸生平自奉止於一飯一蔬衣履非極儉不易卒於官邑人醵貲以助旅櫬乃歸

劉楚河南人以行伍補梧協陸路把總善騎射杭漑有智畧防守岑溪二十餘年康熙戊戌二月朔晨起見賊胡嬰村楚憤恨盡出城內兵得六人合以兵少止之楚曰嬰村去城不二里白日盜劫目中豈尙有官乎我誓不與賊俱生矣遂毅然往賊列陣村外百總劉得勝挺鎗直前賊殲之楚吼怒矢連發不中一賊飛鎗至楚奪鎗賊倒撞田坎下

楚方砍馳刃一賊從旁刺楚墜馬跌賊躍起支解之隨丁聶義至急發炮擊殺楚者不中卽舉炮棊賊終不能突圍而死義子甫十齡驚遽掬土塊擊賊賊逐之旁觀者拉走乃號泣去賊亦返越五日副將劉沛追至連城殺賊五得賊魁快子筒者祭楚云

李世孝字虞徽鑲紅旗人由盛京刑部員外例捐知府於康熙四十八年蒞任梧州歲癸巳大饑倡捐糴米於大雄寺開設粥廠分給各鄉設廠亦如之自是路無餓孛全活者甚衆又捐修儒學建復

茶山書院捐置書院田千餘畝永爲諸生膏火并置產受息以資鄉試路費至今士子沐教澤焉歷任八載軍民士庶稱頌如一口去之日江干兩岸扶老携幼數里涕泣相送兄世仁先於康熙十九年蒞梧亦有惠政梧人思慕立祠茶山書院之東並祀之

張若需桐城舉人康熙六十年由嚴州府丞歷治中遷知梧州府梧郡商賈輻輳東省不逞之徒每潛入爲盜捕之急則遁還東省隔屬關提每至聞風遠遁若需至專意團練鄉勇申明賞罰以鼓勵

之嚴飭保甲守望相助有自首改悔者收作撫丁分隸卒伍中既約束有人又有月糧以餬其口本地無勾引之人而東省賦篋者亦屏跡梧廠爲本省公費所由出利源所在往往因緣爲奸若需處膏不潤商賈稱便稅課以充報最遷驛鹽道值鹽政敝壞

詔令詳議善策遂改爲官運官銷當創制立法之初頭緒繁多若需悉心經畫條分縷析盡中機宜國課無虧東西便之至今食其德焉其他有利於民者行之惟恐後以積勞成疾卒於官

徐嘉賓順天大興人由內閣中書選授桂林同知題陞知府於雍正元年蒞任秉心慈惠事之利民者汲汲爲之而才識明斷諸弊悉除重修藥王廟設方藥以救民疾捐修書院加意造士遇水火賑恤貧乏者必遍給之郡舊無倉儲自捐俸一千五百兩糴米三千石詳請設立社倉以備歉歲賑饑之用蒞任三載其痼瘼民瘼類如此四年調任慶遠府至今士民懷德口碑如新嘗自謂矢志利濟乃夙表庭訓云

劉信嘉號慎齋江蘇山陽人康熙乙未進士雍正

甲辰爲岑溪合蒞任六年修廢舉隆善政不勝枚舉而最著者莫如革里冬一事里冬者岑編戶三里上下化鄉爲一里歸義永業爲一里連城西南鄉爲一里每甲設冬頭一名責令催科三甲各設甲長經紀收解正賦使費而外加以差務供應歲需千有餘金黠者苛派樸者破亡大爲民患信嘉一除其害有慈父母之稱尤體恤士子造就甚衆以老疾乞休歸邑人思慕勿衰建祠常寧墟後于烜號松崖江蘇金壇人乾隆乙丑進士癸酉謁選得岑溪蒞任毀淫祠興文教聽斷明決必得實情戊寅邑大旱米價騰貴烜設法賑濟不辭勞瘁全活者數千人是年冬以疾卒於官士民感泣至今稱之

名宦志

寓賢

自古勝地必多名賢有名賢而勝地益藉以傳梧
 南交一古郡耳非衣冠會萃之鄉而山水僻荒之
 境也然而蒼梧雲深九疑山古抗懷遠矚於斯為
 盛踔厲霞舉者往往低徊留之而不能去名山之
 藏千秋之業敷教澤而光金石是則復乎尚已若
 夫投荒遠徙鬱塞離憂之客懷君門於萬里度嶺
 海而孤征或眺望雲山或流眄景物欣然有觸歌
 咏將之豈惟天外瑤笙已留雪中鴻爪後之人慕

其流風遺韻而沾漑之卽陽春甘雨之餘潤焉耳
漢

劉熙字成國北海人博覽多識建安中薦辟不就
避地交州往來蒼梧南海客授生徒數百人乃卽
物名以釋義作釋名序曰名之於實各有義類百
姓口授而不知其所以然之意故撰天地陰陽四
時邦國都鄙車服喪紀下及民庶應用之器卽物
名以釋義凡二十七篇又著諡法三卷行於世
袁徽陳郡人司徒滂之子以儒素稱遭天下亂避
地交州司徒徵辟不至

程秉字德樞南頓人少明周易詩書事鄭康成得
其奧秘後避亂交州與劉熙考論大義遂博通五
經士燮命爲長史孫權聞其名以禮徵辟拜太子
太傅後卒於官所著周易商尙書駁論語弼凡三
萬餘言

虞翻字仲翔會稽餘姚人孫權以爲都騎尉翻數
犯顏諫諍權不能悅權與張昭論及神仙翻指昭
曰彼皆死人而語神仙世豈有仙人也權積怒非
一徙翻交州翻雖在徙棄心不忘國及遣周賀等
往遼東求馬翻聞之以爲去人才以求馬旣非國

利而遼東絕遠恐無獲復徙蒼梧猛陵後賀等爲
魏人所殺權始思翻言召之會翻卒以喪還翻嘗
云自憾疏節骨體不媚犯上獲罪當長沒海隅生
無可與語死當以青蠅爲吊客使天下一人知已
者足以不憾翻雖處罪放而講學不倦門徒常數
百人又爲老子論語國語註皆傳於世在南十餘

年年七十卒

吳志本傳

薛綜字敬文沛郡竹邑人舉秀才漢末大亂乃依
故人避地交州從劉熙學士燮旣附孫權召綜爲
五官中郎除合浦太守治郡威惠並行民獠愛之

轉守交阯時交土始開刺史呂岱率師計伐綜與
俱行事畢還都授謁者僕射赤烏三年徙左都督
尋爲選曹尙書太子太傅所著詩文名曰私載又
定五宗圖述二京解皆傳於世

顧譚字子默吳郡顧雍孫邵之子弱冠與諸葛恪
等爲太子四友授中庶子歷太常代祖父雍平尙
書事以魯王霸與太子和齊衡譚上疏切諫爲全
寄所構徙交州發憤著新言二十篇其知難篇蓋
自悼也年四十二卒於交阯

宋

張融字思光吳郡人孝武時出爲封溪令道遇獠賊執融將殺以食融神色不動賊異而舍之浮海至交州於海中作海賦與交阯太守卞展善展後爲人所殺融挺身奔赴往還南中竟反其喪

通志

隋

俞益期豫章人寓交州著交州牋

通志

唐

李嗣真字承胄趙州栢水人永昌初以右御史中丞知大夫事來俊臣獄方熾嗣真上書諫以爲昔陳平事漢祖謀疏楚君臣行反間計項羽遂亡今

殆有如平者間陛下君臣恐爲社稷禍不納出爲

潞州刺史俊臣誣以反流藤州久得還

宋之間字延清汾州人武后時賦詩見意奪錦袍

以賜官尙方監丞與韋稚

通志作韋維

稱一臺二妙中

宗時爲修文學士後貶嶺南有經梧州發藤州諸

詩

李白字太白四川成都人謫夜郎時假道藤州寓赤水之廣惠寺寺後有巖白讀書其中因名李白巖有詠紫藤樹詩

契苾承明開元間突厥默啜之彊迫奪鐵勒地回

紇契苾思結渾四部以避之甘涼間四部怨王君
奐繩以法遣使自訴上遣中使察之諸部不得直
於是回紇承宗等俱流遠州契苾承明流藤州
李群玉常自五羊來訪桂州經蒼梧故人舊居有
一院蕉聲暮半庭春影斜之句

楊衡吳興人遊嶺南與陳羽念別有云碧桂水連
海蒼梧雲滿山

宋

洪湛字惟清昇州上元人以右拾遺直史館端拱
初與左正言尹黃裳馮拯右正言王世則宋沆伏

閣請立許王元禧爲儲貳詞氣狂率太宗怒宋沆
坐呂蒙正親黨出爲宜州團練副使乃出湛知容
州容有戍卒謀竊發者湛偵知亟斬之遷比部員
外郎咸平二年召還命試舍人院復直史館

蘇軾字子瞻眉山人以宣仁召用時御史賈易輩
論軾與弟轍作文詞譏斥先朝至紹聖初御史復
以爲言謫英州未至貶寧遠軍節度副使惠州安
置居惠三年貶瓊州行至梧會弟子由亦謫雷州
適先過梧追晤於藤同至雷州渡海而別徽宗立
移永州還廉乃作竹筏下水歷容藤至梧與子邁

約移家會於梧後赦還公固嘗往返梧州藤容間也

秦觀字少游高郵人見蘇軾於徐爲賦黃鶴樓軾以爲有屈宋才登第爲正字兼國史院編修紹聖初坐黨籍出判杭州御史劉拯論其增損實錄貶監處州酒稅使者伺其過無所得則以謁告寫佛書爲罪削秩徙柳州繼編管橫州又徙雷州徽宗立復宣德郎放還至藤州出游華光亭爲客道夢中長短句有云醉臥古藤陰下杳不知南北一日醉起索水欲飲水至笑視之而卒人以爲詞讖先

自作挽詞甚哀時陳無已亦嘗客藤黃庭堅詩曰閉門覓句陳無已對客揮毫秦少游二子不知溫飽味西風吹淚古藤州蓋傷之也

按東坡一帖秦少游過容留少日飲酒賦詩如平常容守遣般家二卒送歸衡州至藤傷暑因臥至八月十二日啓手足於江亭上淮海之卒於藤此其實錄也曰傷暑因臥與志稱出游江亭索水欲飲笑視而卒者其說小異豈志載故未詳耶又夢中曲有春色黃鸝等句此帖所云卒以八月疑非其題詞之時蓋公固嘗往來於

木少居志 卷之一 五
藤豈得拘於一時以爲說哉附錄其詞曰山露
雨添花花動一山春色行過小溪深處有黃鸝
千百 當面化龍蛇天矯掛空壁醉臥古藤陰
下杳不知南北

黃庭堅字魯直分寧人爲國史編修趙挺之上荆
南承天院記指爲幸災徙嶺南至蒼梧爲郡守書
戒石碑尋勝遊咏久之

高登字彥先遼浦人宣和間爲太學生與陳東上
書者再紹興二年廷對無所顧忌有司惡其直授
富川主簿提刑董彝聞其名檄讞六郡獄復命兼

賀州學事學故有田舍時已歸買馬司登請復其
舊守曰買馬養士孰急登曰買馬固急然一日廢
士與堂下卒何異守不能奪卒歸之學攝獄事守
欲脫殺人者藉口陰德登曰陰德豈可有心爲之
殺人者可不死則死者寃何銷哉秩滿士民留不
獲相率餽錢五十萬登婉辭之置於學買書以謝
士已而廣曹鄭高趙不棄辟登攝歸善令遂主試
登策閩浙水災所白直言不聞深可畏論則將焉
用彼相賦郡守李仲文卽馳達秦檜檜震怒坐以
他事取旨編管容州登謫居授徒家事不介意惟

聞朝廷行事小失輒顰蹙不樂臨終所言皆天下大計

李光字泰發越州上虞人高宗時叅知政事秦檜以親黨鄭億年爲資政殿學士光於榻前面折之又與檜語詰上前因曰觀檜之意是欲壅蔽陛下耳目盜弄國權懷奸誤國不可不察檜大怒明日光丐去高宗曰卿斥秦檜舉措如古人朕方寄卿腹心何去哉光曰臣與宰相爭不可留章九上除資政殿學士知紹興府中丞萬俟卨論光陰懷怨望謫授建寧軍節度副使藤州安置越四年移瓊

州又移昌化論文考史怡然自適年踰八十以郊

恩復左朝奉大夫至汀州卒孝宗賜諡曰莊簡

李莊簡公奉祠還里居於新河每言及時事往

往憤切興歎謂秦相曰咸陽一日舉酒屬客曰

某行且遠謫矣咸陽所忌者某與趙元鎮耳趙

旣過嶠某何可免後十餘日果有藤州之命

老學

庵筆

記

吳元美字仲實福州人紹興中爲福建安撫司機宜鄉人鄭璋告其作夏二子賦譏時宰又謂其家亭號潛光有心於黨李堂名商隱無意於事秦秦

檜甚惡之編管容州士子登門從學甚衆嘗遊勾漏山作寶圭十洞記未幾卒容人建勾漏書院於學傍祀之

劉珏字希范長興人登崇寧進士初遊太學以書遺中書舍人鄒浩責其拱默不言浩愧謝宣和中金人攻吉州分兵追太后舟至太和縣衛兵潰珏奉太后退保虔州言者論不已貶衡州紹興初許自便卒於梧州

王循友知建康嘗罪秦檜族黨安置藤州鄭玘有嘲諱講和之語竄容州

曹勛字公顯翟陽人建炎元年至南京以御衣所書進入高宗泣以示輔臣勛建議募敢死士航海入金奉徽宗由海道歸執政難之出勛於外凡九年不遷紹興中歷遷忠州防禦使肅毅等來命勛爲接伴使未幾落階官爲容州觀察使

呂擴齊州人丞相頤浩子官至朝散郎貶梧州司戶秦檜追憾頤浩再竄藤州擴雖在貶所以詩書自娛絕不知有遷逐苦

羅大經廬陵人初爲容州掾後爲范旗叟幕客會僚屬小酌曰今日之集非特不談風月亦且不談

文章只說政疵民病衆皆唯唯惟大經從容曰若
談夫子孟軻之文章以澆光風霽月之胸次則施
之有政當有本末先後而民病有瘳矣旗叟甚善
其言

明

解縉字大紳吉水人洪武戊辰進士上封事論時
政剴切萬言永樂間爲翰林學士直文淵閣時上
方用兵交趾公乃言交趾古羈縻國通正朔時實
貢而已得其地不足郡縣上遂疎公出爲廣西叅
政尙書李至剛奏公怨望謫交趾過藤山喜藤州

水寓水月巖盤桓旬月藤人士多從學焉

程文德字舜敷永康人弱冠有學行嘉靖己丑及
第官翰林編修以言事註累謫廣東信宜尉時督
府陶諧建嶺表書院於蒼梧集兩粵士就業延文
德典教事諸生從遊成立甚衆植竹院後作棲鳳
臺尋遷安福令累官南雍大司成作六章貽蒼梧
從學者一曰自愛二曰辨志三曰務實四曰尙行
五曰敦本六曰持謙位少宰清修一節終始不渝
德行文章爲世所重

高翀字翼生慶遠人崇禎間以貢生任廣東信宜

知縣旋致政僑寓岑溪討論經籍取濂洛關閩以
來諸儒之說而聯貫之著爲四書會解後學宗之
按高翀卽熊徵父寓岑日悅其山川風土遂卜
居焉熊徵隸籍起家岑邑諸生熊徵以經術樹
立其淵源固有自也

林嵩邠州人國子生任監察御史成祖渡江言事
忤旨謫戍廣西交趾叛嵩往征之事平授交州府
同知歷叅政致仕

譚仕演字四我南海人僑寓岑溪喜山水嘗遊秋
風巖得白象之勝入居之巖故多虎人咸畏懼仕
日不入邨市人傳以爲奇

國朝

方以智字密之江南桐城人崇禎間舉進士任中
翰國變時嘗往來於平梧間丁魁楚輩擁永歷爲
帝欲以智爲宗伯三召不起馬蛟麟定梧守志不
屈因祝髮爲僧號行遠寓光孝寺後居廬陵之青
原山稱藥地禪師

鳳山縣志

帝始以醫為宗

鳳山縣志

備國變

鳳山縣志

女以醫學

圖傳

日不入市

鄭竟與鳳山縣志

